

瓊州府志卷之三十四

人物志二名賢下 明 國朝

明

唐胄字平侯瓊山人幼穎敏博通經史百家宏治
 戊午鄉試壬戌會試皆魁禮經賈志授戶部主事
 以憂歸劉瑾斥諸服除久不赴官者坐奪職瑾
 誅召用以母老不出嘉靖初起故官疏諫差內
 臣蘇杭織造請為宋死節臣趙與珞追諡立祠
 進員外郎遷廣西提學僉事為購羣書以迪多
 士令土官及猺蠻悉遣子入學擢雲南金騰副
 使土酋莽信虐計禽之木邦孟養構兵胄遣使

瓊州府志

卷三十四

人物

名賢二

一

宣諭木邦遂獻地屢遷廣西左布政使官軍討
 古田賊久無功胄遣使撫之其魁曰是前唐使
 君令吾子入學者即解甲明史本傳時王府宗室受
 封賄官吏補支祿米自出幼具題曰為始歲費
 幾千萬石乃奏革其弊得旨如議通行天下微獻
錄擢右副都御史巡撫南贛移山東遷南京戶
 部右侍郎十五年改北部進左侍郎帝以安南
 久不貢將致討郭勛復贊之詔遣錦衣官問狀
 中外嚴兵待發胄上疏諫曰今日之事若欲其
 修貢而已兵不必用官亦無容遣若欲討之則
 有不可者七請一一陳之古帝王不以中國之

治治蠻夷故安南不征著在祖訓一也太宗旣滅黎季犛求陳氏後不得始郡縣之後兵連不解仁廟每以爲恨章皇帝成先志棄而不守今日當率循二也外夷分爭中國之福安南自五代至元更曲劉紹吳丁黎李陳八姓迭興迭廢而嶺南外警遂稀今紛爭正不當問奈何殃赤子以威小醜割心腹以補四肢無益有害三也若謂中國近境宜乘亂取之臣考馬援南征深厯浪泊士卒死亡幾半所立銅柱爲漢極界乃近在今思明府耳先朝雖嘗平之然屢服屢叛中國士馬物故者以數十萬計竭二十餘年之財力僅得數十郡縣之虛名而止况又有征之不克如宋太宗神宗元憲宗世祖朝故事乎此可爲殷鑒四也外邦入貢乃彼之利一則奉正朔以威其鄰一則通貿易以足其國故今雖兵亂尙纍纍奉表巖具方物欸關求入守臣以姓名不符卻之是彼欲貢不得非抗不貢也以此責之詞不順五也興師則需餉今四川有採木之役貴州有凱口之師而兩廣積儲數十萬率耗於田州岑猛之役又大工頻興所在軍儲悉輸將作興師數十萬何以給之六也然臣所憂又不止此唐之衰也自明皇南詔之役始宋之

衰也自神宗伐遼之役始今北寇日強據我河套邊卒屢叛毀我藩籬北顧方殷更啓南征之議脫有不測誰任其咎七也錦衣武人闇於大體倘稍枉是非之實致彼不服反足損威卽令按問得情伐之不可不伐不可進退無據何以爲謀且今嚴兵待發之詔初下而征求騷擾之害已形是憂不在外夷而在邦域中矣請停遣勘官罷一切征調天下幸甚章下兵部請從其議得旨待勘官還更議明年四月帝決計征討侍郎潘珍兩廣總督潘旦巡按御史余光相繼諫皆不納後遣毛伯溫往卒撫降之郭勛爲祖

瓊州府志

卷三十四

人物

名賢二

三

英請配享胄疏爭帝欲祀獻皇帝明堂配上帝

明史本傳胃抗疏言三代之禮莫備於周孝經曰郊

祀后稷以配天宗祀文王於明堂以配上帝又

曰嚴父莫大於配天則周公其人也說者謂周

公有聖人之德制禮作樂而文王適其父故引

以證聖人之孝答曾子問而已非謂有天下者

必皆以父配天然後爲孝不然周公輔成王踐

阼其禮皆爲成王而制於周公爲嚴父於成王

則爲嚴祖矣然周公歸政之後未聞成王以嚴

父之故廢文王配天之祭而移於武王也後世

祀明堂者皆配以父此乃誤會孝經之義而違

先王之禮昔有問於朱熹曰周公之後當以文
王配耶當以時王之父配耶熹曰只當以文王
為配又曰繼周者如何熹曰只以有功之祖配
後來第為嚴父說所惑亂耳由此觀之明堂之
配不專於父明矣今禮臣不能辨嚴父之非不
舉文武成康之盛而乃濫引漢唐宋不足法之
事為言謂之何哉明史禮志帝大怒下詔獄拷掠削
籍歸遇赦復冠帶明史及疾篤聞帝奉章聖太后
梓宮南耐喜曰此神聖之見也猶力疾北向叩
首蕭志尋卒隆慶初贈右都御史胄耿介孝友好
學多著述立朝有執持為嶺南人士之冠明史本傳

瓊州府志

卷三十四

人物

名賢二

四

為文有理致源委不尚浮靡篤嗜白玉蟾詩文
為之精選名海瓊摘稿所著有瓊臺志江閩湖
嶺都臺志西湖存稿行於世阮通志祀鄉賢子穆
嘉靖戊戌進士禮部員外郎為人雅樸有父風
著有餘學錄孫恪以廕授官蕭志

陳實字秀卿瓊山縣人宏治戊午鄉薦壬戌進士

劉瑾用事家居足跡不入城市蕭志遭父喪服闋

未起瑾矯詔例勒除名瑾敗起為南京江西道
御史時內臣趙蘭以內旨採珠於合浦騷民黷
貨劾罷之尋以母喪去服闋除廣西道辛巳出
按應天徽寧諸郡舉劾無所遺蕪湖有沙灘民

業葦利中貴奪之實奏還於民嘉靖初出知常
州至嚴參見之儀謹文移之式爲遠大而不屑
近小朞月上孚下悅稱循良歲大祲民率走死
憂甚檢庫中羨餘得錢若干緡糴穀貯之或勸
分富室不聽曰人各爲家勸猶斂也是冬有年
浙東海道倭人入貢與人交貨羣鬪殺人都指
揮以下驅焉而被害者一人傷者若干人事聞
朝議守者不豫欲置重法上遣都給事中劉會
巡按御史王臨覈之檄與其實言倭來以貢
不以寇事出不虞安能豫之雖然官亦不能無
罪若加重法則過矣至士卒於主將死不赴救

自有常法亦不可加重上如議從之旣歸常病
士習之浮靡欲以正學倡之謂宋楊龜山嘗與
鄒道鄉諸君子講明程學於常留寓最久乃建
道南書院取程子送龜山語也平居無浮言妄
動事必有則精密平恕每以古人自期居家孝
友內外無間言從弟容死遺孤二人育之成立
有田數百畝歲入取給賓祭日用餘悉分諸宗
族士官某犯法以數千金乞言緩死峻拒之阮通
志嘗曰學重養心尤莫先於辨義利人多銘座
右撫按交薦卒於官御史朱實昌爲之奏請卹
與蓋異數也所著有虛菴集祀鄉賢蕭志

鍾芳字仲實先崖州人改籍瓊山少育外親因黃
姓後奏復焉自幼穎異十歲入州學宏治辛酉
領鄉薦第二正德戊辰登進士二甲第二選翰
林庶吉士授編修以忤時左遷寧國府推官精
於吏事能折滯獄他郡咸求質成政績大著會
大水歲祲議行賑恤民獲奠居部使者交薦其
賢陞漳州同知尋擢知府事時兵憲欲征漳寇
芳主相機撫剿督府卒從其議陞南京戶部員
外郎署吏部稽勲司郎中轉考功一時名公如
劉春羅欽順凡甄別優劣皆從其言遂實授陞
浙江提學副使校文必尙名檢敦行力學者爲

瓊州府志

卷三十四

人物 名賢二

六

上穎悟淹貫言行知慎者次之挑達諧蕩者文
雖工必懲由是浙士斐然向風陞廣西右參政
單車入洛容諭降賊帥羅朝墮等千餘人尋調
兵扼險攻柳州馬平之穿山峽賊皆喙息貴縣
多虎患爲告山神虎悉遠遁會督府召議軍事
芳留蒼梧而鷓剿六青諸峒招降賀縣恩柳等
寨皆其策也黃佐撰墓誌銘討田州叛酋岑猛定平樂
大藤峽屢有軍功捷聞兩賜金帛陞江西右布
政使凡藩祿軍需之難處者區畫悉得大體獻徵
錄庚寅陞南京太常寺卿明年春大臣行祭告
禮欲比正祭芳言告祭主於誠不在備物禮當

與正祭異惟用脯醢酒果上從之著爲令尋攝
國學講論經義求諸身心胄子莫不感動陞南
京兵部右侍郎與參贊王廷相協恭革弊諸凡
秕蠹爲之頓清改戶部右侍郎與許讚經略邊
儲以紓民力復查舊規嚴限以警濡滯散餘米
給軍以免鬻船之患於是漕政大舉甲午七月
南京太廟災自陳修省以回天變言甚剴切且
乞休益力上重違其請准致仕家居十餘年未
嘗一至城市惟以書史自娛有干以私者謝曰
吾守志猶發婦豈以晚而失節耶事繼母楊至
孝兄甦弟英早夭禮恤憚發俾守貞得所人以

瓊州府志

卷三四

人物

名賢二

七

爲難其爲文雄渾精深氣隨理昌論學以程朱
爲宗嘗言性根諸心非學弗培故道問學卽所
以尊德性非有二也又謂存養兼動靜非端默
靜坐之謂知行本自合一知以利行行以踐知
理無內外心亦無內外也晚年卜築於瓊名其
居曰對齋義取對越上帝事道卽事天也蓋其
用功益密所造益深矣墓誌甲辰卒於家年六十
九計聞贈右都御史賜葬祭芳性簡重寡嗜慾
其爲學博極而精雖律厯醫卜之書靡不通貫
然皆取衷於孔孟正論爲嶺海鉅儒所著有學
易疑義春秋集要皇極經世圖續古今紀要崖

愁略小學廣義養生舉要及詩文二十卷行世

獻徽子允謙字汝益為人純實廉靜無求讓父

廕於從子鄉人高其義登嘉靖己丑進士知浙

江寧海縣稽飛稅均丁糧復塘壩以滋灌溉牛志

以經學飾吏治泄事嚴而有法庭無私謁建社

學置社田留心教化陞刑部主事浙江通志歷陞知

福州府有惠政丁艱起復補知萊州卒於官與

父同祀鄉賢允謙子儲溫純厚事繼母得其

歡心尤善處兄弟不失世訓賈志

曾鵬字元翰瓊山人父英以正統甲子鄉薦宰茂

名清苦愛民鵬宏治辛酉鄉薦正德甲戌進士

瓊州府志

卷三十四

人物 名賢二

八

知龍溪兵荒相仍乃緩征薄斂捐俸修學築八

都諸隄有惠政民立石頌焉牛志祀名宦擢刑部

主事歷福建副使辨冤獄如神改貴州都勻兵

備旬月卒土寇蒙鉞招降海口賊阿向晉參政

未行分守某欲自以為功乃率眾襲賊全軍覆

沒撫臣急檄鵬終其事至則單車入賊壘賊駭

曰聞公已遷去今猶在耶鵬為言禍福遂解兵

聽約束郭通志未幾以足疾乞休疏三上不許乙

未入覲時武定侯郭勛當國外官多餽遺者鵬

曰吾生平不能委曲今老矣奈何白首改節遂

歸郝通志海忠介稱鵬為先輩師法祀鄉賢賈志

李珍澄邁人經明行修正德戊辰領儋州歲貢任
江西永豐訓導精於易義爲永豐士尊信陞上
林教諭勸革火化之俗民作生祠以祀丁內艱
改懷遠教諭以德綏猶民王陽明擢爲南寧府
教授未幾致仕歷官四任家貧如故年七十五
人號清白先生

蕭志

蔡仕儲字鍾秀瓊山人質粹行純博極羣書通五
經年十八爲人師年長以倍者皆北面執弟子
禮有河汾之風有司欲周其貧堅守齋如也高
雷之士越海從遊者甚眾正德庚午領鄉薦遊
大學發尙書人心道心之旨申明義利之辨祭
酒湛若水深服之林參政士元贊其爲明道先
覺潛德化鄉云學者稱石南先生

黃通志

祀鄉賢

瓊州府志

卷三十四

人物

名賢二

九

蔡伯祥字景和瓊山人恬靜簡默學問蘊藉正德
間由舉人任翁源訓導

黃通志

伯祥任翁源十六

年爲人口吃而善屬文提學魏校招至省城講
學韶州知府周敘延入郡城爲六邑弟子員講
授應聘廣西衡文甚稱得人以會試卒於途旅
櫬至韶諸弟子哭之哀知府唐昇給資歸祀名

宦

翁源縣志

祀鄉賢

林士元字舜卿瓊山人正德庚午鄉薦甲戌進士

授行人冊封唐藩饋金六十鎰卻不受王深器
之乙酉擢南京戶科給事中劾光祿少卿史俊
怙勢殺人都御史汪鉉考察不公併劾罷內外
不職者數十人仕路一清先後陳時務數十疏
皆極剴功壬辰擢湖廣副使備兵衡永江華流
民與土戶爭田構兵連年禍延諸郡士元單騎
往諭爭遂息吏部郎中鄧尙義之弟挾制守令
侵牟里黨按以法轉廣西參政分守蒼梧戊戌
征大藤峽士元督餉紀功有貴勢子弟希報功
次絕不假借捷奏擢浙江按察使未赴以憂歸
遂不起祀桂林名宦郝通志晚年家居時或戴笠

瓊州府志

卷三十四

人物 名賢二

十

躬耕鄉人賢之所著有學思子中庸孟子衍義
讀經錄讀經附錄孔子世家顏子列傳討論北
泉論草及文集十卷祀鄉賢阮通志

陳大章字紹遠瓊山人正德庚午鄉薦司訓漳州
遷安仁教諭擢竹溪縣令有政聲以終養家居
杜門誨子郡守張子宏雅重之郝通志曾纂修漳
志卒年七十有五縣志祀鄉賢

楊愷瓊山人正德癸酉舉人嘉靖癸未進士任南
京戶部主事告終養歸祀縣鄉賢

陳常字時敏瓊山人少孤貧讀書不爲記誦夜坐
沉思有所得卽燃燭書之觀中庸至廢寢食語

人曰中庸無所不貫吾人終身受用不盡正德
癸酉領鄉薦任化州學正督學魏校歐陽鐸俱
重之屬校兩漢書以憂去補寧州擢知桂平三
年罰鍰不入已上官派貨於屬邑令鬻之常曰
夙聞瘠已肥民不聞虐民媚上竟謝職去士民
泣送之舉祀名宦常性嚴恪處屋漏如對大廷
不少放恣鄭廷鵠稱其篤實務學不近勢利皆
實錄也志子應辰字思齊性資端謹有父風長
於詩文執父喪三年廬墓不懈嘗市繢商有誤
加者計直所贏追而還之郝通志好施予戚屬貧
乏多所周濟不忍傷物雖微而鳥窠蜂房必戒

瓊州府志

卷三十四

人物

名賢三

士

護之嘉靖辛酉貢於鄉授古田司訓以內憂起
補臨川多曲成士類轉代藩教授卽拂袖歸家
居十一年雖屢空晏如也每題柱曰書本看來
多少益菜根咬得有餘香卒年七十有五賈父志
子均祀鄉賢

羊修儋州人貢生孝友慈惠先知新城繼補雩都
民咸愛之後以母老乞歸養百姓懇留不獲爲
之製碑立祠歷任俸餘捐助宗黨祀鄉賢牛志

吳效字復初瓊山人性孝義少遊邑庠當食餼遭
內艱輒惻然不忍就其季子死於車輓車家以
貲求免固卻之牛志曰汝何心誤傷耳里中多好

訟廢學乃構精舍行朱呂鄉約演四禮以勸說
之祀鄉賢郝通志

吳會期效子字可行篤行古道正德己卯鄉薦時
僉憲汪鋹以所罰黎民悅七十金為餽會期受
而還之民悅登嘉靖癸未進士授南京戶部主
事轉工部郎中營九廟稱旨嗣修七陵內侍高
宗冀營私蠹會期不與既告成省費十五萬進
正四品俸服牛志時嚴嵩當國欲會期附己私語
同官熊某曰此郎視京堂若固有足不一至吾
門何迂也會期聞之作迂愚解嚴嫉之言者承
嚴意旨論謫於外遂拂衣歸肅皇晏駕衰服宿

瓊州府志

卷三十四

人物 名賢一

三

崇文院三日倚廬於中門外者二十七日其忠
愛如此立家廟置義田日與親族相規勸海忠
介稱貌古心實直指陳道基旌其門阮通志祠鄉

賢祠

汪有執字義甫瓊山人事繼母以孝聞領正德己

卯鄉薦知海門陞通州守河間同知歷官戶部
員外郎悉稱職郝通志後去任家居十餘載絕跡

公門享年八十賈志祀鄉賢

吳誠字明卿瓊山人性敏嗜學領正德己卯鄉薦
初授柳城教諭督學重之檄掌八桂書院修柳
城志遷潁州教授修都臺志擢知龍南釐夙弊

釋士人馮堯寃獄流賊爲患誠躬撫諭賊魁謝
鉞李鑑皆感泣而去尋討平沙頭賊徐守沐一
方賴之致政家居絕跡城市嘗參酌藍田鄉約
率鄉人月朔舉行當道造廬禮焉誠少孤有姑
適舉人李明年二十四孀居撫誠比姑卒誠服
衰三年人兩義之郭通志每遇考妣忌辰哀痛竟
日姊年八十迎養於家歿葬從厚所著鴈峯集
百餘卷牛志祀鄉賢祠

余宗梁阮志作俞字景山瓊山人正德己卯鄉薦嘉靖
丙戌進士博極羣書而性方直知新昌縣爲政
嚴毅而濟之以寬遇歲大稔設法施賑民賴全

瓊州府志

卷三十四

人物 名賢二

三

活者數萬指有搶掠爲盜者勸諭歸農民怙恃
如父母又毀浮圖立社學旌孝節治行爲一時
最擢南京刑部主事歷郎中讞議惟平有豪貴
矚重八者正色卻之常俸所入皆以奉母恤弟
不入私囊及卒妻孥不能自給侍郎鍾芳重之
爲紀其行以傳焉黃通志祀鄉賢

張士毅字子剛定安人姿性穎異正德己卯鄉薦
初宰銅陵縣明敏果斷以論事忤上官左遷茶
陵州判清河家乘嘉靖二十六年擢廣西陽朔令二
十九年徭寇廖金濫越城劫庫士毅與百戶曹
恩俱被執不屈死之

國朝道光十九年陽朔官民請祀名宦陽朔縣關移文案

黃顯字仁叔瓊山人嘉靖壬午鄉薦辛丑進士授

刑部主事治獄多所平反抵中貴呂洪賊罪雪

總兵沈希儀註誤皆不為當軸屈出守撫州罷

築千金陂以蘇民困完逋數萬而刻核不及於

下郡民立祠祀焉以憂歸郭通志補池州池故饒

山澤利顯益謹身率下不少徇私狼兵自湖趨

浙所過殘暴顯以智服其帥而厚犒之迄不為

害郝通志尋擢湖廣副使時嚴嵩方用事遂乞休

卒祀鄉賢長子宏字字震祥少受學於尙書霍

韜年十七舉嘉靖庚子順天鄉試登己未進士

瓊州府志 卷三十四 人物 名賢三 古

授戶部主事督運昌密陳五難三便監兌南都

復以水災備陳損上益下用一緩二之義民困

獲甦郭志出守武昌作政約諭僚屬一意廉靜楚

藩以事餽黃金百兩不受景王歸葬使人以禮

諭中官復下令曰護軍敢譁吾境者執之既過

卒無敢譁者凡興利革弊恤獄賑饑俱有聲八

觀首舉卓異尋擢四川副使歷浙江參政以憂

歸牛志次子宏憲字賁祥嘉靖乙卯舉於鄉令南

康著古制以自檢約建六議以正民風懸鉅告

奸設匭稽弊郭通志有葉楷者贛湖巨寇宏憲條

可捕治狀撫院江一麟允行之檄鄉民勦其巢

穴江爲具奏加五品俸服調知安遠以憂未任
牛志起補懷集捕魚峒鹿馬諸寇有功撫按交薦
未幾卒郭通志均祀鄉賢

蕭成字子紹崖州人少喪母有弟尚幼繼母陳氏
復生弟二人獨私愛之成自少至冠友愛惟均
陳氏感化領嘉靖壬午鄉薦任甌寧教諭丁艱
歸以父遺田產悉與次弟又出俸貲構舍與繼
母二弟居焉次弟應試溺於海撫恤遺孤經理
婚嫁無異己子隣人死不能殮亦爲具棺葬之
李茂寇亂人多棄城走成晝夜同州官巡城鄉
里壯之郝通志祀鄉賢

瓊州府志

卷三十四

人物

名賢二

五

莫士及字汝賢定安人博學能文制行端方嘉靖
乙酉舉於鄉授蘇州教授取朱子家禮及邱文
莊儀節參定訓士陞常寧知縣寓撫字於催科
朞年境內大治致仕家居修族譜作家訓以教
族人所著有筆峰日錄祀常寧名宦本邑鄉賢
孫汝德萬曆戊子鄉薦有文名蕭志

廖士衡字平卿瓊山人性剛方動遵矩矱領嘉靖
乙酉鄉薦知德化判南寧所至有政聲致仕家
居雅存古道年八十卒祀德化名宦郝通志祀鄉

賢

陳天然字汝中瓊山人孝友溫惠有雅量登嘉靖

戊子鄉薦乙未進士授戶部主事兩督倉儲監鈔九江俱以廉節著歷陞鎮江府知府適遇荒旱而洲灘虛稅爲民累天然至輒爲釐減江寇猖獗厲兵備禦郡賴以安故事需用科派里甲天然盡革之爲置公田租入取辦捐俸立學田賑貧士李億冉信等例監曹大章屈於格天然器之力爲薦拔連魁南宮廣東僉憲劉絃齋表入賀中途邁危疾極力調護後卒爲殯殮歸其櫬居官性狷介不能俯仰要路改知永州府丁內艱歸家居親賢下士詩酒自適兄弟故舊貧乏者必周貸無靳至焚雷蕭各券拜祭師墓卓

瓊州府志

卷三十四

人物

名賢三

十六

有古風所著有自新遺稿祀鄉賢

牛志

鄭廷鵠字元侍瓊山人少警敏從塾師海貞範學

宏博辨麗海奇之妻以女登嘉靖戊子鄉薦戊

戌進士授工部都水主事

阮通志

調儀部尋陞吏

科給事中晉工科左給事會京師地震上便宜

四事一黃花鎮古北口朝河川爲京師後門宜

遣官築關城增水壘一貴州地連三藩權不統

一宜設總督置一控三於法便且省費一京師

草場等處督理者率歲遷因以滋弊請限三年

一蘇松等郡財賦所滙請設參藩董其責成俱

關宗社至計所畫策類爲國家建長利嘉靖庚

戎大計吏疏皆手出以公正稱徐中行撰傳是年校

易禮闈一時出門下者皆海內名士張文毅公

服其有人倫之鑒牛志擢江西督學副使廉公有

威裁抑僥倖嘗修白鹿洞志增置書院田尋遷

江西參政以母老乞歸築室石湖著書自娛累

薦不起所著有藿膾集瓊志彙易禮春秋說蘭

省掖垣學臺石湖等集若干卷祀鄉賢郭通子志

儒別見儒林傳

許益光字可大瓊山人嘉靖戊子舉於鄉孝友天

植讓產於兄捐其妻粧送資賄以嫁兄女計偕

逆旅殯友林儀鳶人多其義知湖廣瀏陽縣冰

瓊州府志 卷三十四 人物 名賢二 十七

葉自持以文勘民田積勞而卒民哀如喪考妣

祀名宦郝通志祀鄉賢祠孫暉斗領萬厯壬子鄉

薦官至戶部主事阮通志

李應和字仲節瓊山人嘉靖戊子鄉薦授臨海教

諭陞徽州教授尋署府篆賑饑條上數事皆採

時良策擢南監助教以老乞歸所著有讀書抄

水齋集郝通志祀鄉賢

趙志科榜姓劉文昌人中嘉靖辛卯鄉試以母老

侍養不仕性恬淡榮利無染結廬中山歌咏自

樂周太守柳塘扁旌曰清修博雅云牛志祀鄉賢

陳表字子仁文昌人性慤行端領嘉靖癸卯鄉薦

授書里中上議兩臺請革長岐賓宰二驛歲減銀七百兩甚為民便在桂陽知州濟貧生核侵冒省冗費疏止採礦桂民德之尋遷岷府官勇退告休牛志宦歸無異寒素祀鄉賢蕭志

海瑞字汝賢一字國開瓊山人先世隸籍番禺洪武十六年有答兒者從軍海南著姓瓊山不數傳族氏蕃衍至寬領鄉薦知閩中縣事即其大父寬子廩生翰即其父瑞生而秀挺稍知識直欲學聖賢梁雲龍撰傳四歲而孤母謝氏矢志訓之自為諸生時即抱當世之慮郝通志居室間人所易忽瑞獨謂此正君子造端之道位內位外飭

瓊州府志

卷三十四

人物 名賢二

六

已型家一切男女僕役至老死不踰樞闕相往來處伯仲姻婭肅雝坐立跪拜惟禮其論文則日不過如畫師之寫神耳窮一生讀書作文於國家身心毫無補益何異宋人所謂可惜一生心用在五字上乎故瑞之用心匪特恥為聲詩即古今文辭要以闡發性靈而止不稟古則而自成一家嘉靖丙午督學林某廉其行誼大加獎賞適出婦某訟瑞且誣裝資林某詰問以出妻令其可嫁對至所誣裝俱不辯惟貸償而已林益重之已酉督學蔡某試題有不日白乎之句手瑞卷珍翫移時因詢瑞隱事嘆曰茲所謂

渥而不緇者耶

梁撰

是年舉鄉試所對治黎策

曰天下之事圖之固貴於有其法而尤在於得其人何謂法經畫而條理之卓有成績可考者法之謂也何謂人所以經畫而條理之卓以成績自許者人之謂也得其人而不得其法則事必不能行得其法而不得其人則法必不能濟人法兼資而天下之治成則夫今之瓊黎其處置之法固所當講而以身任事之人又非瓊之所深望者乎夫執事之問華心宣化之圖山川夷險之勢叛服得失之由愚生固曰得其人之爲貴何也誠見夫蠢茲有眾可以一鼓而擒而

瓊州府志

卷三十四

人物

名賢三

九

直爲是廩廩者亦曰地險不可以馳驅兵強不可以禦敵不知自古及今之寇未嘗不據險以爲強自古及今之師亦未嘗畏險而長寇苟我不弱天下無強兵苟我術周天下無險地瓊崖衛所之兵自邱文莊奏不許征調以來今日已如驕子其不足以應敵也明矣故前郎溫之敗皆未戰怯聞千里臨敵先期於敗爲之也先哨去而後哨攻彼欲進而此欲退爲之也今日之禍雖有以激之使然然猖獗二年崖民死徙將盡未有勦絕而安輯之者尙得謂之有人乎今王命赫然舉兵誅之夫以萬全之力視此直孤

兔耳其束身繫頸計日可待也然愚生之所憂者元至元屯田立學復起文河之憂毛伏羌提師壓境不開十字之道欲爲目前苟安之圖不思萬世無窮之利根株之不拔則未必後日之不如今也夫瓊黎中處環海州縣譬之人則心腹之疾也失今不治後將浸淫四潰而爲四肢之患皇甫規所謂虺蛇入室不可一日安焉者也故愚生以爲今日之計不過堅持開十字道之心固執立州縣之計而已自此之外雖議之之盡其方處之之盡其術皆下策也何者昔之議者謂盡殺黎類爲忍而究其所以爲說不過

曰禁商人之貿易則黎無以爲矢刃之資夫利之所在人共趨之雖死有所不顧而况於鐵首其戎者乎是奸商雖不可不禁而有不容於盡禁者矣不過曰禁軍民之逃亡則黎無以深劫奪之毒夫徭役不擾俯仰是資固有樂之者况於州縣復爲之毆乎是逃亡雖不可不禁而有不容於終禁者矣不過曰禁土酋之刻削則黎無以爲變亂之激夫讀書知禮義者浚剝良民雖廉恥有所不顧而况於土酋之無知者乎是貪酋雖不可不懲而有不容盡懲者矣始終悞宋者在一和字始爲一時撫綏之計不可以策

黎也革心宣化效且遲於百年官吏之遷陟不
常人性之貪暴不一以一人之身而思以一德
化之不可以策黎也所宜乘今日大軍之勢首
惡旣平之後開通十字大路州縣之可移者移
之屯田之可徙者徙之遷良民之無田者佃其
中其不宜勦滅者徙之於外夫然後爲百年之
計而瓊民享無窮之福矣不然今日赫然之舉
復如前日收兵之速剷除雖盡於小民無所益
也又安知後日之不如今而復爲民害乎又不
然而徒曰革心宣化云者吾未見州縣之未立
十字之未通而可以革心宣化也嗚呼此所以

瓊州府志

卷三十四

人物

名賢二

三

得其人之爲難而非得其法之爲難也愚生之
所憂者如此而已矣而其所以策於執事者亦
不過如此而已若夫山川夷險之勢叛服得失
之由瓊志厯厯如照愚生欲語而未暇焉狂瞽
之見惟執事進而教之入都卽伏闕上平黎策

策見海
黎門

時以疏下兵部議覆獻說計便宜燦若

指掌而事竟寢

阮通志

癸丑授南平教諭揭申棖

剛者之辨鄉原忠信廉潔之似古人不見諸侯
之守以廣厲學士其參謁上官執憲綱抗師儒
禮督學朱衡重之檄掌書院郝通志御史詣學官
屬吏咸伏謁瑞獨長揖曰臺謁當以屬吏此堂

師長教士地不當屈明史本傳抗顏南平四年如一

日守相臺察咸交稱之擢知淳安縣事履境睹

痛苦萬狀用是申飭所行事宜由縣而丞而尉

而師儒而里老而生員而吏胥著為令曰淳安

政事梁雲龍撰傳其知縣參評曰知縣知一縣之事

一夫不獲誰辜一民失所予咎所以入單父之

野見棄魚之俗則知子賤之政矣履中牟之境

見雉馴之休則知魯恭之政矣為政不同而要

不外乎敬天勤民之念且災異上則減膳徹樂

譴告上則蠲租求言凡膺斯民之責者體上天

之意而噢咻之熒獨必哀饑寒必恤不飢一法

瓊州府志

卷三十四

人物 名賢二

三

不私一錢肺石下無梧邱鬼覆盆中鮮鵠亭冤

為民開必得之門明必死之路而鴈聲不哀鼠

牙無訟則政簡而刑清矣此豈家有治縣之譜

哉良由萬物一體之懷而誠求之也乃今則異

是矣一旦縮半通得一邑遂沾沾然色喜埋沒

真心不惜廉恥多方措克以充囊橐腹生民之

膏填谿壑之欲甚至有鐘乳三千胡椒八百之

謂而不顧者嗚呼縣則右矣官能清乎槐根瘠

矣馬骨高乎貪酷若此殊不知上而朝廷吾父

母中而撫按藩臬僚屬過客鄉士夫吾長兄弟

下而吏書里老百姓人等吾子姓遇之各有正

道若謂止可潔已不可潔人潔人生謗謂所行不可認真認真生怨取禍不顧朝廷之背否以鄉原之道待其身以鄉原之道待吾子吾長兄弟浮沉取名竊取官爵非知縣也本縣初意直欲以聖賢之所已言者據守行之自謂效可旋至迄今四載中夜返思日日催徵小民賣妻鬻子未有完事之日時時聽訟小民爭鬪趨利未有息訟之期感孚之道薄而民不化燭奸之智淺而弊猶存徒有其心未行其事徒有其事未見其功誦法孔孟幼學之壯行之期月而可三年有成有深愧焉俗吏非所以語我若曰稱知

瓊州府志

卷三四

人物

名賢二

三

縣職則全未也

海忠介公集

其自奉也俸薪外絲毫

不侵撫按出例陰遺其吏書無則禍至瑞曰充軍死罪甘受安可爲此穿窬舉動外官入京有交際謂做官不得不如是瑞曰盡天下而不爲上官之賂豈盡不遷又盡天下而惟上官之賂豈盡不黜安可身居下流也

深雲龍撰傳

布袍脫粟

令老僕藝蔬自給總督胡宗憲嘗語人曰昨聞海令爲母壽市肉二斤矣宗憲子過淳安怒驛吏倒懸之瑞曰曩胡公按部令所過無供張今其行裝盛必非胡公子發囊金數千納之庫馳告宗憲宗憲無以罪都御史馮懋卿行部過供

具甚薄抗言邑小不容車馬具按其生事者懋卿恚甚然素聞瑞名爲斂威去而屬巡鹽御史袁淳論瑞時瑞已擢嘉興通判坐謫興國州判官久之陸光祖爲文選擢戶部主事時世宗享國日久不視朝深居西苑專意齋醮督撫大吏爭上符瑞禮官輒表賀廷臣自楊最楊爵得罪後無敢言時政者四十五年二月瑞獨上疏曰臣聞君者天下臣民萬物之主也其任至重欲稱其任亦惟以責寄臣工使盡言而已臣請披瀝肝胆爲陛下陳之昔漢文帝賢主也賈誼猶痛哭流涕而言非苛責也以文帝性仁而近柔

雖有及人之美將不免於怠廢此誼所大慮也陛下天資英斷過漢文遠甚然文帝能充其仁恕之性節用愛人使天下貫朽粟陳幾致刑措陛下則銳精未久妄念牽之而去反剛明之質而誤用之至謂選舉可得一意修真竭民脂膏濫興土木二十餘年不視朝法紀弛矣數年推廣事例名器濫矣二王不相見人以爲薄於父子以猜疑誹謗戮辱臣下人以爲薄於君臣樂西苑而不返人以爲薄於夫婦吏貪官橫民不聊生水旱無時盜賊滋熾陛下試思今日天下爲何如乎邇者嚴嵩罷相世蕃極刑一時差快

人意然嵩罷之後猶嵩未相之前而已世非甚
清明也不及漢文帝遠甚蓋天下之人不直陛
下久矣古者人君有過猶賴臣工匡弼今乃修
齋建醮相率進香仙桃天藥同辭表賀連宮築
室則將作竭力經營購香市寶則度支差求四
出陛下誤舉之而諸臣誤順之無一人肯爲陛
下正言者諛之甚也然媿心餒氣退有後言欺
君之罪何如天下者陛下之家人未有不顧其
家者內外臣工皆所以奠陛下之家而磐石之
者也一意修真是陛下之心惑過於苛斷是陛
下之情偏而謂陛下不顧其家人情乎諸臣徇

私廢公得一官多以欺敗多以不事事敗實有
不足當陛下意者其不然者君心臣心偶不相
值也而遂謂陛下厭薄臣工是以拒諫執一二
之不當疑千百之皆然陷陛下於過舉而恬不
知怪諸臣之罪大矣記曰上人疑則百姓惑下
難知則君長勞此之謂也且陛下之誤多矣其
大端在於齋醮齋醮所以求長生也自古聖賢
垂訓修身立命曰順受其正矣未聞有所謂長
生之說堯舜禹湯文武聖之盛也未能久世下
之亦未見方外士自漢唐宋至今存者陛下受
術於陶仲文以師稱之仲文則既死矣彼不長

生而陛下何獨求之至於仙桃天藥怪妄尤甚昔宋真宗得書於乾祐山孫奭曰天何言哉豈有書也桃必採而後得藥必製而後成今無故獲此二物是有足而行耶曰天賜者有手執而付之耶此左右奸人造爲妄誕以欺陛下而陛下誤信之以爲實然過矣陛下又將謂懸刑賞以督責臣下則分理有人天下無不可治而修真爲無害已乎太甲曰有言逆於汝心必求諸道有言遜於汝志必求諸非道用人而必欲其唯言莫違此陛下之計左也卽觀嚴嵩有不下順陛下者乎昔爲同心今爲戮首矣梁材守道守官陛下以爲逆者也歷任有聲官戶部者至今首稱之然諸臣寧爲嵩之順不爲材之逆得非有以窺陛下之微而潛爲趨避乎卽陛下亦何利於是陛下誠知齋醮無益一旦翻然悔悟日御正朝與宰相侍從言官講求天下利害洗數十年之積誤置身於堯舜禹湯文武之間使諸臣亦得自洗數十年附君之恥置其身於臯夔伊傅之列天下何憂不治萬事何憂不理此在陛下一振作間而已釋此不爲而切切於輕舉度世傲精勞神以求之於繫風捕影茫然不可知之域臣見勞苦終身而終於無所成也今

大臣持祿而好諛小臣畏罪而結舌臣不勝憤恨是以冒死願盡區區惟陛下垂聽焉帝得疏大怒抵之地顧左右曰趣執之無使得遁宦者黃錦在側曰此人素有癡名聞其上疏時自知觸忤當死市一棺訣妻子待罪於朝僮僕亦奔散無留者是不遁也帝默然少頃復取讀之曰再三爲感動太息留中者數月嘗曰此人可方比干第朕非紂耳會帝有疾煩懣不樂召閣臣徐階議內禪因曰海瑞言俱是朕今久病安能視事又曰朕不自謹惜致此疾因使朕能出御便殿豈受此人詬詈耶遂逮瑞下詔獄究主使

者尋移刑部論死獄上仍留中越二月帝崩穆宗立乃獲釋帝初崩外廷多未知提牢主事聞狀以瑞且見用設酒饌款之瑞自疑當赴西市恣飲噉不顧主事因附耳語曰宮車適晏駕先生今卽出大用矣瑞曰信然乎卽大慟盡嘔出所飲食隕絕於地終夜哭不絕聲旣釋復故官俄改兵部擢尙寶丞調大理隆慶元年徐階爲御史齊康所劾瑞言階事先帝無能救於神仙土木之誤畏威保位誠亦有之然自執政以來憂勤國事休休有容有足多者康乃甘心鷹犬搏噬善類其罪又浮於高拱人謹其言歷兩京

左右通政三年己巳夏以右僉都御史巡撫應天十府屬吏憚其威墨者多自免去有勢家朱丹其門聞瑞至黜之中人監織造者爲斂輿從明有吳淞江人淤爲陸而常熟白茆港河道日湮瑞疏濬之身乘小舟督畚鍤不晷月告成民忘其勞並活饑民數十萬賈志素疾大戶兼并力推豪強撫窮弱貧民田入於富室者率奪還之下令飭發凌厲所司惴惴奉行豪有力者至竄他鄉以避由是怨頗興都給事中舒化論瑞不達政體宜以南京清秩處之帝猶優詔獎瑞已而給事中戴鳳翔劾瑞沽名亂政遂改督南京

瓊州府志

卷三十四

人物 名賢二

三六

糧儲瑞撫吳甫半歲銳意興革民賴其利小民聞當去號泣載道家繪像祀之將履新任會高拱掌吏部素銜瑞并其職於南京戶部瑞遂謝病歸萬厯初張居正當國亦不樂瑞令巡按御史廉察之御史至山中視瑞設鷄黍相對食居舍蕭然御史嘆息去居正憚瑞峭直中外交薦卒不召十二年冬吏部擬用左通政帝雅重瑞名昇以前職明年正月召爲南京右僉都御史改南京吏部右侍郎瑞年已七十二矣疏言衰老垂死願比古人尸諫之義大略謂陛下勵精圖治而治化不臻者貪吏之刑輕也諸臣莫能

言其故反借待士有禮之說交口而文其非夫
待士有禮而民則何罪哉因舉太祖剝皮囊草
及洪武三十年定律枉法八十貫論絞謂今當
用此懲貪其他規切時政語極剴切獨勸帝嚴
刑時議以為非御史梅鵬祚劾之帝雖以瑞言
為過然察其誠為奪鵬祚俸帝屢欲召用瑞執
政陰阻之乃以為南京右都御史諸司素媮惰
瑞以身矯之有御史偶陳戲樂欲遵太祖法予
之杖百司惴恐多患苦之明議革有司諸冗役
冗費極言軍民利病時御史房寰督學南畿物
議沸騰恐瑞糾擿欲先發牛志給事中鍾宇淳復
從懇寰再上疏詆瑞明觀政進士諸壽賢顧允
成彭遵古抗疏畧言寰妬賢醜正不復知人間
羞恥事臣等自幼讀書即知慕瑞以為當代偉
人寰大肆貪污聞瑞之風宜愧且死反敢造言
逞誣臣等所為痛心因劾其欺罔七罪始寰疏
出朝野多切齒而政府庇之但擬旨譙讓明史
顧允成傳瑞亦屢疏乞休慰留不允十五年丁亥冬卒
於留都阮通志瑞無子卒時僉都御史王用汲入
視葛幃敝簾有寒士所不堪者因泣下醵金為
斂小民罷市喪出江上白衣冠送者夾岸醉而
哭者百里不絕贈太子太保賜祭葬諡忠介瑞

瓊州府志

卷三十四

人物

名賢二

三九

為學以剛為主因自號剛峯天下稱剛峯先生

明史海瑞秉剛勁之性慤直自遂蓋可希風漢汲

黯宋包拯苦節自厲誠為人所難能明史傳贊雖官

歷六卿編茅自處環堵蕭然然子姓稍有不戢

必鳴之官未嘗假借尚書姜寶謂瑞天下奇男

子志節兼狂狷云所著有備忘集淳安政事稿

行世郝通志平日雖不以文名而所作勁氣直達

侃侃而談有凜然不可犯之概當嘉隆間士氣

頽茶之際切墨引繩振頑醒曠誠亦救時之藥

石也滌穢解結非大黃芒硝不能取效未可以

其峻厲疑也欽定四庫全書備忘集提要 祀鄉賢

瓊州府志

卷三十四

人物 名賢二

三

王贊襄字辰台澄邁人少英悟讀書過目成誦嘉

靖已酉以禮經舉亞元猶未冠也藩臬諸司為

加冠禮隆慶辛未考選中書第一授內閣制勅

中書舍人進青宮十二規使閩特賜璽褒美擢

大理寺右寺副奉勅馳封陞戶部員外郎以內

艱旋里恬養十餘年著有澄源稿略阮通志祀鄉

賢

蔣蒙字養正阮通志作 瓊山人嘉靖間由歲貢任

靈山訓導陞建寧教諭兩任俸餘俱買田以給

貧生署靈山縣事寇臨城率兵捍禦境賴保全

靈人建生祠牛任建賜教諭性節儉食僅脫粟

衣敝不堪所入俸錢悉以周貧乏給喪葬卒於官篋無餘貲喪不能歸聞者悼之

阮通志

王允升字巽甫定安人父儔

賈志作禧

好義樂施有隱

德允升重厚寡言笑不治家人生產嘗被盜有司追還百餘金允升以非原物不受人稱其介

後應貢授訓導至留都卒及子宏誨貴顯咸謂

奕世厚德之報

郭通志

王才美字汝周定安人周慎孝友由歲貢訓邵武

憂歸廬墓三年起復北流教諭捐俸修堂廡祭

器轉沅州學正不就歸贖弟田宅盡還之祀北

流名宦定安鄉賢

蕭志

瓊州府志

卷三十四

人物

名賢二

三

曾暉萬州人德性寬厚器度宏深事祖父母盡孝

恤弟女有恩訓子孫篤親友不喜道人過失與

物無忤嘉靖間貢授福安尹善於其職致仕家

居絕跡公庭年八十終

牛志

楊應辰字德良瓊山人禎之姪由貢授梧州訓導

陞柳城教諭致仕家居孝友任官清慎事病姑

如母撫遺姪猶子養寡嫂終身且厚葬之有司

屢舉大賓不就卒海忠介銘其墓

牛志

陳茂芳

蕭志作懋芳

字仲敏定安人知縣丕顯子少穎

悟博學通經史九歲能文十五歲應舉時以神

童目之中嘉靖壬子鄉試以名節自勵授清豐

教諭歷知龍巖縣有治績民德之祀生祠海南
道蔡夢說龍巖人按瓊思其舊政爲立坊曰清
朝廉吏祀鄉賢賈志

程大慶字子壽瓊山人少孤篤學領嘉靖壬子鄉
薦平生無疾言遽色事嫡母生母以孝聞隆慶
壬申寇至捐家貲以勞守戍癸酉計偕不果還
路費於有司子五人誨化有方祀鄉賢牛志

劉裁正字伯傳瓊山人領嘉靖戊午鄉薦天性孝
友居家貲財不私妻子與人交常推心置腹未
仕而卒賈志祀鄉賢

王宏誨字紹傳定安人少穎異博觀羣書日記千

瓊州府志

卷三十四

人物 名賢二

三

言弱冠登嘉靖辛酉解元乙丑進士選庶吉士
時海忠介以極諫忤旨逮獄瀕危極力調護尋
陞編修充會試同考官所取皆名士張居正當
國作火樹篇春雪歌譏之歷春坊諭德掌南京
翰林院事瓊士每赴雷州考試有渡海之險疏
請改海南兵備兼擬學考校疏見藝文瓊南十
四學諸生至今稱便擢國子祭酒陞南京吏部
右侍郎轉北京禮部兼翰林院侍讀學士經筵
講官加太子賓客吏部左侍郎掌詹事府教習
庶吉士牛志充會試副總裁品藻精核登錄極一
時之選拜南京禮部尙書上疏請建儲御講等

六事因病乞休疏數上得旨回籍復起補職引
考滿例致仕爲閭里重望郝通志 創建尙友書院
誘進後學瓊屬生童感其疏改提學之德建生
祠祀之所著有尙友堂稿南溟奇甸集天池草
吳越遊記來鶴軒集傳世卒贈太子少保賜祭
葬祀鄉賢縣志

王汝爲字子宣瓊山人賦性剛方學稱博洽嘉靖
辛酉鄉薦爲貴縣教諭有蘇湖風丙子充貴州
鄉試同考試官陞鄱陽縣令勵精爲治勤恤民
隱竟以正直難容乞歸囊橐如洗性尤友愛厚
事兄嫂捐貲贖弟於難里巷稱之詩文力追古

瓊州府志

卷三十四

人物 名賢二

三

雅有尋懷集存塾稿撫絃餘韻

郝通志

祀鄉賢

林華字原積文昌人嘉靖辛酉鄉薦隆慶戊辰進
士授九江府節推廉明鯁介行取擢南京戶部
主事差解餉羨餘悉以報朝敕管九江鈔關羨
金悉貯九江庫卒於官年五十祀鄉賢牛志

王懋德字敏中文昌人嘉靖甲子鄉薦隆慶戊辰

進士授刑部主事轉工部郎中

蕭志

由南京比部

郎出爲金華守前後無善去者獨以廉察擢江

西按察司副使

蕭志作出爲金華府歷九江

旋晉福建右參

政年五十一無子多餌燥藥攝建南篆歸得消
渴疾先是延平人有病此者以溺甘爲死候自

試之甘度不可起乃請歸不允慨然曰懋德之
違定省十有六年願萬一生見父母死且瞑不
然卽死道路吾志猶南首也時父良弼及母皆
八十餘矣於是遂行僚友爭致贖固卻不受行
至延平之將樂不能前竟卒卒之日神爽不亂
遺書謝僚友誓不受奠賻使者以爲不可遂循
故事括六白金遣使傳護之渡海至則授金封
君良弼不受曰吾子業有成言吾卽耄奈何取
六白金以傷吾子之義祀鄉賢阮通志

王時元字遇春瓊山人逸士用之子也樸茂謙恭
篤志力學嘉靖甲子鄉薦知楚之東安縣察覈

瓊州府志

卷三十四

人物

名賢二

三

鹽艘剔除陋例遷判常德冰蘖益厲冤獄久不
決者立洗之歲饑賑粥存活數千人丁母憂歸
不受一餞歲餘卒所著有四禮集童訓郝通志祀

鄉賢

陳大有瓊山人家貧篤學古樸端方由歲貢領嘉
靖甲子鄉薦令常山革去陋羨涖民有善政至
今常山人稱之郝通志有生祠祭田同聲錄祀鄉

賢牛志

梁雲龍字會可瓊山人家貧篤學領嘉靖甲子鄉
薦萬曆癸未進士授兵部武庫司主事戊子典
試貴州所取多名士兵部尙書鄭洛經略臨洮

雲龍贊畫建言絕甘涼假道以扼川海之吭果
奏奇捷晉副使治兵井陘旋調天津天津故京
師咽喉時倭侵朝鮮勢甚猖獗有增設邊防之
議雲龍持議以爲宜勅將帥固守罷敵臺陷阱
諸費所省數十萬進參政治兵開原巨寇繫頸
受成功著紀錄調隴右分守備兵莊浪會土營
魯氏橫恣不法奪其營務遂中蜚語以參政聽
調遵例候代尙從大司馬經略兩河松山之役
恢復允吾一帶故地三千餘里無何解任抵家
以敘前後邊功復原任進荆南布政使以征苗
功荷褒獎

郝通志

楚藩變起就陞湖廣巡撫擘畫

瓊州府志

卷三十四

人物

名賢二

三五

楚事親藩懃蒞盞蒞等五人有罪擬置大辟時
論難之上從其擬

牛志

遂竟其獄丙午卒於官贈

兵部左侍郎賜祭葬祀鄉賢

阮通志

子思泰在忠

烈傳

郝志

陳傅嘉瓊山人孝友樂施以歲貢赴京殯亡友於
途而資其僕歸司訓詔安捐俸助貧生時倭寇
犯城傅嘉令僕善弓矢者射殺數賊寇退詔安
令欲上其功力止之未幾告休祀詔安縣名宦

後祀鄉賢

蕭志

陳大烈字允成瓊山人隆慶丁卯鄉薦授處州司
訓署慶元龍泉二縣一塵不染丁艱起復補訓

泉州擢武義令民立生祠陞烏撒同知恬退歸
休居家睦於邦族一味清修祀鄉賢牛志

黃可久會同人隆慶庚午鄉薦為湖廣黔陽令居

官循良處家仁讓捐八百餘金買義田以賑濟

饑寒鄉里賴之呈縣勒碑記其事阮通志祀鄉賢

王天麟字文瑞瓊山人領隆慶庚午鄉薦知贛縣

八觀途遇李氏女鬻於陳啼號欲赴水死天麟

慨然以五十金贖還其母丁外艱歸卒於家阮通志

志祀鄉賢

吳遜之賈志作舜之字義卿澄邁人少通大戴禮居家

孝友溫恭領萬曆丙子鄉薦任海澄教諭甲午

瓊州府志

卷三十四

人物

名賢二

三六

充南京鄉試同考官所取皆知名士後擢武緣

令卒於家祀鄉賢蕭志

牛大緯字章甫號闇齋瓊山人萬曆己卯鄉薦令

連城民苦浮糧為累歲輸千餘金大緯力請得

蠲其半捐俸賑荒民賴全活去日治裝惟圖書

數卷而已民立祠祀之陞邛州知州阮通志

吳一瀾字惟源定安人力學好古尤篤孝友喜成

人美絕談人惡手編家禮以訓俗講學傳經多

科名士劉總憲旌其廬祀鄉賢牛志長子秉機萬

曆辛卯鄉薦知永興縣稱循吏孫日耀萬曆戊

午科舉人阮通志

許子偉字用一瓊山人孤貧力學登萬曆壬午鄉薦丙戌進士授行人尋擢兵科給事中轉吏科右抗顏諫諍直聲大著創瓊州會館於京師鄉紳羈旅稱便告病歸籍假滿補戶科右給事中
以彈劾權貴忤旨謫銅仁府經歷遂歸養母凡戚里貧乏多所賑給值黎寇猖獗貽書當事請勦之內使開採珠船科派瓊珠役以萬斛子偉力言得減其數置義學於儋耳開敦仁書院於郡中中外疏薦起用未報卒著有諫垣錄廣易通敦仁編鄉人請祀於明昌塔以配邱海今祀鄉賢

郝通志

瓊州府志

卷三十四

人物 名賢二

三

陳應龍字時見瓊山人天性孝友父嘗犯罪應龍哀鳴願以身代當事憐釋之家貧舌耕門生楊瑾自海北來受業病死捐棺爲之殯領萬曆壬午鄉薦判嘉興督理織造一洗舊例以不逢時

罷歸 郝通志 祀鄉賢

董綾字瑞卿號錦堂儋州人少孤力學萬曆二十一年以選貢任興化府判凡徵收倉糧必躬閱量概胥役無所容奸嘗攝篆侯官勾稅皆以清慎著銓曹署其牘曰一塵不染三事足稱改調太平府以開關受賞擢知陸涼州條陳土官之弊折其奸謀致政居鄉遷建學宮有功庠序上

何其義字乃仕瓊山人少英穎萬厯甲午鄉薦
丑進士知政和縣剔蠹釐奸捐俸募建學宮以
異等調繁上杭冰蘖自矢杭人尸祝之內艱起
復擢戶部主事司太倉革一切浮羨陋規與許
子偉捐貲創瓊南會館以便瓊之赴京者壬子
督儲通州卒於署

阮通志 祀鄉賢

潘之楫號寰瀛瓊山人天性篤孝生甫週歲母陳
孀居撫之長出就傅母每留餘食啖之之楫見
突無烟知母未食忍殮半以奉母母燈下紡織
之楫取師所授書就餘光而讀才名甚著登萬
厯甲午賢書戊戌上公車向母泣曰楫以母苦

瓊州府志

卷三十四

人物

名賢三

三

節未揚親恩未報故爲此萬里之行不則安忍
離膝下乎是歲會試乙榜厯任善化縣著賢聲
赴闕陳情賜建坊以表母節焉祀鄉賢

牛志

黃壽之瓊山人宏字子由萬厯丁酉舉人知浙江
景寧縣爲海忠介壻清廉節愛綽有婦翁之風
時民散田荒官民交困申請丈量合邑安堵陞
處州本府同知後致仕歸

阮通志

王欽瓊山人世籍土舍欽少爲諸生剛方尙義善
騎射萬厯二十六年居林居礫二崗黎反欽募
兵捐餉同官軍討平之編隸版圖兩走京師請
豁黎浮田稅鄉人至今稱頌之

郝志

陳邦禎字德興瓊山人少失怙恃依戚黨以成立
苦志篤學有鄰女挑之峻詞固拒不減魯男子
風以歲薦訓高涼郡守李序嘉其行誼督學文
簡亭羨其藝文譽滿士林官六載囊橐蕭然牛志
祀鄉賢

謝應華瓊山人歲貢生事親甚孝有弟被掠傾產
贖之司訓天台旋諭詔安教授南雄皆有蘇湖
遺範食貧課子子龍文發名成業鄉里稱之郝通

志祀鄉賢龍文字喬東萬曆戊午鄉薦崇禎戊
辰進士知豐城縣廉潔自持百廢具舉有政聲
阮通志

瓊州府志

卷三十四

人物

名賢二

三九

莫乾亨定安人萬曆庚子舉人爲城步令舊例有
徵收餘羨力革之天啓元年西苗倡亂塔溪乾
亨禁差軍健入峒騷擾苗人來格民得安堵阮通志

張希堯號元溪瓊山人萬曆癸卯亞魁讀書明道
賦性端嚴恒以修己治人爲務當謁選時值同
籍爲郎語之曰此來可得美官應曰有命存焉
絕無纖芥營謀任廣西羅城縣知縣官橐蕭然
樂育所就率多名彥迨僂遊初服遠近負笈執
經者踵相接也所居堂曰四嗇謂松有花而嗇
香竹有葉而嗇花梅有香而嗇葉渠以一嗇老

於三齋之間云狷潔天成言笑不苟仲子洪字允湛領天啓辛酉鄉薦嘗親朋宴集座侍青樓歸輒厲色訶戒曰若婢子我輩安可並席又或家僕博奕相戲督洪令跪責以禮法不謹詎能刑家其古道多類是迄今兒童走卒皆知元溪先生焉

牛志

邱爾懿號秉初登萬曆己酉賢書卽丙午鄉薦爾毅胞弟係文莊七代孫任江西贛縣知縣居官廉介吏畏民懷兄弟允稱二難惇睦燕詒公庭罕跡

牛志

劉大霖字孟良臨高人上思知州珍之子登萬曆

瓊州府志

卷三十四

人物

名賢二

罕

乙卯賢書已未成進士歸隱不仕以文章自娛居家孝友盛德可親祀縣鄉賢

蕭志

陳天德樂會人萬曆四十五年以歲貢授三水訓導廉潔自好課文考行他無所及貧士以脩脯至謝曰吾祿雖薄差強諸生義不受蓋古君子也

郝通志

蔡廷椿字一卿瓊山人七歲失怙哀毀骨立由陵水歲貢任霍邱丞歸橐蕭然居鄉課子弟捐田四十畝供膏火鄉族有不善者惟恐其知之子希皇狷慤好修士論賢之

蕭志

吳鉉鍾號惺一瓊山人萬曆戊午科舉人博學宏

才筮仕湖廣均州知州視民如子值流寇攻州
捍禦半年檄召援兵危疆賴靖北歸家無餘積
恬如也牛志

薛鳴鳳會同人由歲薦任福州訓導品行端方時
以修身齊家之要教人學校推崇閭里欽式祀

鄉賢蕭志

王紹先會同人由歲薦任江陰縣丞學行醇篤居
官廉潔祀鄉賢

盧紳字一敬樂會人由歲薦任富川縣知縣以廉
潔自持招撫猺獞境內帖然乞歸安貧履素卒
年八十四祀鄉賢

瓊州府志

卷三十四

人物 名賢

聖

陳是集字虛斯蕭志作虛期號筠似文昌人秉性清介

少慕海忠介爲人登天啓辛酉鄉薦崇禎辛未
進士居親喪哀毀骨立任中書出使蜀粵諸王
奉金不受旣復命壬人嫁禍下之獄會赦得免
復官未赴居鄉食貧刺不入公庭所撰有南溟
詩集並著中秘稿牛志祀鄉賢

梁思泰瓊山人雲龍子由恩廕入太學登天啓順
天副榜判湖廣荊州陞貴陽府同知奉差督餉
征黔寇義激捐軀崇禎十四年承旨敕勲諡忠
烈賜祭葬建坊立祠祀鄉賢廕子燮鼎入太學

牛志

韋賢卿字忠與樂會貢生爲人孝友端肅家居刺不入公門嗜讀書手不釋卷居喪不肉食燕處無懈容筮仕嶧令值大祲請捐逋賦四千餘金招墾荒田五十餘頃俸入盡以資賑濟再令安溪風紀肅然巨室斂服擢安寧府值滇獍竊發賢卿出奇兵單騎截之擒巨猾李斌威名日震遷貳平越剿撫平樂二十餘寨且才長讞決案無留牘惜未大展卒之日以二帶易棺櫬歸遠近慟惜牛祀鄉賢子章玉領崇禎丙子鄉薦博洽多聞克世其家賈志

王天拯字士亨樂會人孝友端方性不喜浮屠樂

瓊州府志

卷三十四

人物

名賢二

望

與人爲善尤嚴義方勤化導鄉黨有爲非者不敢令其知常焚券還婢救溺賑饑以明經肄業辟雍歸家築書館嘉惠後學卒年八十三祀鄉

賢蕭志

楊彥字兆東瓊州人偕薛通考貢督學以正貢薛

通年耄文劣屬意於彥力辭不就友人翁正思省試卒捐貲扶櫬歸葬以歲貢任合浦訓導陞南康教諭擢湖州教授祀鄉賢孫登翰舉於鄉張紹美瓊山人父號自軒以戴禮冠東粵因授禮焉童誦輒通大意十七補郡弟子籍籍有聲居家孝友食餼郡庠屆貢前一月而卒時論傷之

具詞追稱遺行郡守黃公督學商公考錄實蹟
特賜孝行崇祀鄉賢牛志

曾開字公實號泰階儋州人生而穎異過目成誦
弱冠領崇禎癸酉鄉薦為文援筆立就尤工詩
處人以和臨事能決編修韓廷芑目以儋耳碩
士所編儋州志三卷有功於儋阮通志祀鄉賢

文明字孔昭萬州人以人才授交趾主簿海寇侵
境率兵勦擒郡守欲奏請加秩明辭歸事母至
孝友愛其弟分已產與之祀鄉賢蕭志

國朝

林運鑑字千史文昌人新寧訓導奎之子舉康熙

瓊州府志

卷三十四

人物 名賢二

聖

甲子鄉薦居父喪哀毀骨立謁選得江西高安
縣躬親勸稼建文昌閣集諸士誦讀置田為膏
火資分校鄉闈所取皆知名士禁溺女置義塚
折獄嚴慎任七載報最母年老陳情不獲因疾
卒於任崇祀名宦康熙五十四年舉鄉賢郝通志

王宗祐樂會人資性穎異博綜經史康熙甲子舉
於鄉丙戌授四川溫江令邑苦旱宗祐築江安
堰邑苦澇宗祐浚楊柳渡民飫其利以老乞休
鍵戶讀書所著有觀瀾齋文選歷朝詩鈔畧學
者宗之祀鄉賢

王啓宏樂會人髫年遊鄉校試輒冠軍貢名太學

司訓增城陽春兩邑士皆慶得師致仕去居鄉十七年掃跡城市善解紛平其曲直而彌縫其闕鄉有鬪者咸恧然曰無使彥方知之輒不終訟其爲人所敬服如此力行善事食其德者稱道弗衰俱同上

林儲英字子千瓊山人自少英異家貧苦學博涉經史康熙己卯鄉薦沉酣於古文詞翰之間生平規行矩步嘖笑不苟爲多士楷模當道延掌書院名雋多出其門授蒙陰令署沂州政蹟卓然卒年七十有七蕭志

張日旼字穆侯文昌人乾隆丙辰進士選雲南宜

瓊州府志

卷三十四

人物

名賢二

四

良縣政尙簡易以課士訓農爲務奉委修銀汁河捐俸金千餘開張子溝於北屯四十餘里灌漑陸涼路南宜良三州縣瘠土皆成膏腴邑人建報德祠於河頭營肖像祀焉調新平治如宜良尋署路南州事告養歸居父喪廬墓一年以毀卒宜良新平俱祀名宦阮通志

